

嘉靖平倭祇役紀畧

第五冊 疏表

嘉靖平倭祇役紀畧卷五

慈谿趙文華原實甫著

掣調兵疏

題爲查議遣留客兵以預防禦事先該兵部題
爲馳報地方緊急倭情事議調山東等處兵各
一枝共二萬九千徑赴提督衙門調度題奉

欽依咨行到臣該臣看得賊勢緊急各兵緩不
逮事徒擾地方通行停止只得擬調京營涿州

保河民兵及沿途不拘民兵隨宜調用俱經具
疏題 知訖該臣親選在京民兵止有百餘堪
用者充爲前導隨選涿州二百河間一千山東
三千徐邳一千五百通共不滿六千名且募且
行以驅揚鎮常州之賊卽此連獲桃花港乍浦
之功其總督衙門所調永保土兵赴期稍後臣
等多方鼓舞無不奮躍其成沈庄之捷維時臣
等卽慮兵多民擾地方不堪則先掣保靖次永

順再次容美及毛葫蘆兵其徐珏左灝朱應唐
王尹秉衡北兵相繼掣回重賞而速發兵民俱
稱快便續該總督衙門調取麻寮大刺施州鎮
溪等兵六千員名將到臣等竊料明年防禦之
計宜留此兵分布浙直要害加意撫字以待不
虞但今夏之賊惟侵犯揚州一夥半爲逸去誠
恐復肆窺擾留都及漕運重地所宜加慎臣等
議得合于今冬擇選參將一員兵備一員募選

北直隸山東等處精壯箭手約三千名量給安家衣裝銀兩限二月以裏俱至揚州教場住劄操練以爲遊兵有警聽總督衙門調遣截殺如五月無警卽許掣回至于海上以兵船爲之哨擊內地以鄉兵爲之防守皆在督撫衙門及時整飭着實舉行無得專恃客兵致賊窺犯伏乞勅下該部覆請施行則戰守備而兵食節遠近免繹騷之患矣十月二十八日奉 旨兵部

知道

獻俘疏

題爲獻俘事爲照逆惡賊首徐海陳東麻葉等
勾引倭夷入寇浙直攻圍城邑荼毒生靈敵殺
官兵逆天犯順五年于茲頃者荷蒙 皇上軫
念地方 特命臣統兵致討仰仗 天威震赫
用兵三月而諸賊授首倭夷蕩平浙直肅清萬
民安堵臣奉 勅還京所有擒獲內逆首惡陳

東麻葉徐海弟徐洪并倭首辛五郎密之摩多
許公四飛過柴由門等七名及徐海首級委同
知張大顯管押到京所有一應獻俘事宜伏乞
勅下禮兵二部查議具題施行奉 旨禮兵
二部查議來說

條陳防禦疏

題爲議處防禦事宜以固東南重地事臣再奉
命督兵浙直于彼中事情便宜可行者不敢

再瀆外但今地方雖寧瘡痍未起其安內攘外
以爲萬全自治之策不可少緩謹以臣所愚見
要務六事敢條舉 上聞伏乞 勅下該部詳
議施行謹開坐具題請 旨

其一乞降 恩詔頃者醜夷犯順荼毒生民
皇上軫念地方思以出之水火者無所不
至比於蕩平之日民皆舉手加額狂躍奔呼
祝誦 萬壽感激難狀仰知 聖澤洪深民

心思治之切之至此也書曰如保赤子夫赤
子有疾方瘥之時爲之父母者當加慎護諄
諄訓戒俾知自保今者海外島夷素爲姦民
勾引未知天朝威德沿海居民多無知犯
法今雖悔悟無由自新懷忠赴義死事之魂
未荷超錄積逋追併株連逮繫莫補于儲賦
者未蒙蠲免咸願天恩覆冒大布沾濡之
澤伏乞普施恩詔咸與維新又海上居

民近年海禁太嚴漁樵不通生理日促轉而
從盜并乞 勅下該部查臣先年所奏海防
事宜再加奏 請施行則海宇同春華夏胥
戴矣

其二足兵餉臣在兵間據各領兵官呈稱調
到海船及腹裏鄉兵各缺行糧數月兵士嗷
嗷咸慮生變據該司道呈及准該巡撫衙門
咨稱急缺錢糧備開借支在官數多加徵無

處除臣酌量緩急將戶兵二部募餉銀各三萬兩權給主客糧餉之數僅充一二其明年大約計各軍門浙江缺銀四十萬兩江南北各二十萬兩眾議于今歲應解戶部折兌或鹽法鈔關錢糧數內截留抵給伏望 勅下該部通行酌議來歲兵餉作何預備無致加賦重益民困則事功可以責成而瘡痍漸起矣

其三治孽本福建地方海瀕之民多通番爲盜臣嘗具奏南澳島中尤爲淵藪近有通番商犯王道宗等連名具狀乞宥罪圖報此等必須專官稽察區處消逆爲順但海道副使等官格于勢豪莫能展布若如近日羣臣建議另設都御史一員專管福興則恐官多民擾合無以浙福巡撫都御史專一駐劄福興修理海防逐一區處前項事宜斯禍端可絕

其浙江巡撫事務悉聽總督衙門如兩廣事例兼管則事有分屬而無偏廢之患矣

其四一事權比年海寇爲患添設諸臣隨宜奏用動多掣肘今內地旣寧所宜斟酌事權裨如臂之使指彼此相應乃可責成該臣于去年八月內題爲會議海防設總副參將等官分駐海上防賊已經該部題覆各有專任無容別議惟江防事務未獲歸一相應議處

查得舊制提督操江都御史不妨院事節制
江防一應事務下江轄至松江金山衛而金
山備倭總督上轄儀真江南江北之軍出海
會哨上下中外之間體統明甚故江海門戶
防維甚固也今操江出外駐劄而聽劾于巡
江御史則既失居重馭輕以尊臨卑之體金
山副總兵卽舊之備倭總督乃無會哨江北
之權江北巡撫又不奉有提督軍務之勅

操江兵餉仰給巡撫兵船無所分屬卒然有
警難以調度展布臣嘗諮會當事諸臣以江
海之防分爲三節自南京以至儀真爲上一
節責之操江衙門而會哨于儀真自儀真以
至狼福二山爲中一節責之常鎮儀揚參將
把總會哨狼福而巡江御史駐劄鎮江參轄
之自狼福至金山衛江海相界爲下一節責
之通州蘇松參將把總而金山副總兵常川

會哨巡江御史兼轄之其造船募兵錢糧各
以撫操所屬港次分別料理庶免掣肘誤事
如蒙乞 勅該部申飭事權備載 勅書使

各嚴加遵守則統屬分明而無推調之患矣
其五留班軍近該漕運衙門咨據 中都留

守司及鳳泗等衛呈鳳陽中等九衛所官軍
專爲護守 皇陵 皇城并五處高牆原無

操運至永樂間摘撥官軍運糧正統乙巳之

變暫借官軍赴京分班操備正德間流賊猖獗撫按衙門題准將九衛所京操官軍盡數存留事寧仍取京操今年倭寇侵犯瓜揚巡按御史吳伯朋將本司所屬九衛所仍要盡數存留守護又儀揚滁淮大河五衛通泰興鹽四所各地方濱臨江海連年倭寇侵犯各軍盡赴操運止存老弱不堪之人守城不敷乞比例暫留班軍各等因到臣該臣今夏